

Mbaw Faenz Yahmoq

□ Yiz Ciz / 余执

Yahmoq gvaqseiq ngoenzde, fwn roengzsoebsoeb, loh mbaeqmbatmbat, mbwn nitiriri, rumzbaek boqfifi, gyoengq vunzmbanj bouboux mbwq–langlang, bouboux song fwngz sonh roengz ndaw daeh vaq bae cungj mbouj dawz yut okdaeuj.

Doenghbaez, ndaw mbanj miz vunz gvaqseiq, daengx mbanj vunz mbouj aeu heuh couh gag bae bang guh saeh. Yahmoq caeuq boubwnq mbouj doxdoengz, geijcib bi daeuj, vunzmbanj cungj mbouj miz geijlai boub maij de, ndigah mbouj miz geijlai boub maij byaij gaenh de. Seizneix de gvaqseiq lo, mbouj miz geijlai boub bae bangfwngz.

Goengliuj dwg ndaw mbanj boub souhgyaeu he, seizneix de gaenq mumh hau, byoemgyaeuj hix hau caez, de gangj vah vunzmbanj mbouj miz geijlai boub mbouj dingq. Goengliuj naeuz: “Gij saeh neix bouboux miz ngoenzde, ngoenzneix daengz ranz neix, ngoenzlaeng daengz ranz haenx. Boubgeq naeuz ‘vunz roxnaj ngoenz gwn, mbouj roxnaj ngoenz dai’, miz byawz ndaej gyaeu fanh bi, mbouj ndaej baenzneix, daihgya lijdwg vaiqdi bae ranz de bang guh di saeh ba.”

Dingq Goengliuj yienghneix gangj, daihgya cungj roxnyinh mbouj bang gangj mbouj ndaej bae. Yaep ndeu, gyoengq vunzmbanj cungj daengz ranz Yahmoq bae lo. Miz boub caeuq gyoengq lwg de itheij, ram Yahmoq cuengq roengz ndaw faex bae, miz boub bae bang cawj haeux cawj byaek, miz boub bae bang caep lingzdangz. Bouboux guh neix guh haenx, cungj nyaengq hwnjdaeuj.

Yahmoq heuhguh maz coh, vunz–mbanj mbouj miz byawz rox, de ngamq haq daeuj moq, youh geq dem, vunz–mbanj couh heuh de guh Yahmoq, itcig baenzneix heuh.

Dieg dou baenz gvenq, boubvunz dai le, aeu cingj goengdauh daeuj guh mo, danghnaeuz boub dai geq couh guh song hwnz sam ngoenz, coz couh ngoenz he hwnz he couh ndaej oksang. Lij cingj vunz hawj boubdai sij mbaw faenz ndeu, mbaw faenz neix aeu sij gij saeh ndei saeh rwix ciuhvunz boubdai okdaeuj caez, yaek dawz boubdai bae ndoi seiz heuh goengdauh doeg hawj sojmiz vunz dingq.

Gyoengqvunz gig yawjnaek mbaw faenz neix, mbaw faenz neix sij ndaej ndei mbouj ndei, sij ndaej cienh mbouj cienh, couh baengh boub sij neix lo. Doenghbaez miz boub cingj goengdauh daeuj bang sij, miz boub heuh ndaw ranz boub rox saw daeuj sij. Yaek sij faenz gaxgonq, boubcawj heuh ndaw ranz boub haemq geq youh caeuq boubdai gyaucingz haemq ndei he daeuj, lwnh boubdai ciuhvunz baedauq hawj boubxij dingq, caij menh sij roengzdaeuj.

Ndaw mbanj suenq gou lai rox di saw, sij mbaw faenz Yahmoq gienh saeh neix couh hawj gou guh lo. Gyoengq lwg Yahmoq heuh Goengliuj



daeuj, daengq de lwnh gij saeh Yahmoq hawj gou. Gou riu naeuz: “Gou mbouj dwg ci rumz haeuj saejgeq, ciuhvunz Yahmoq, ndaw mbanj raeuz itdingh mbouj miz byawz beij gou lij cingcuj.”

Vunzmbanj buenq saenq buenq ngeiz, gyoengq lwglan Yahmoq hix mbouj daih cuengqsim, Goengliuj naeuz: “Deng, daeglwg neix gangj ndaej deng, sou gaej you lo, de sij ndaej.”

Dingq daxmeh gou lwnh, Yahmoq lij iq seiz couh gaen daxboh de dauqcawq deuz bing deuz caeg, de 18 bi seiz gaen daxboh de deuz daengz mbanj daxmeh gou daeuj. Yahmoq vunz diegrog, ndang hung sang, noh hau maeg, naj gyaunde, daeglwg dicuj ndeu lij caengz miz yah, vunzmbanj couh guhmoiz hawj Yahmoq haq hawj daeglwg dicuj, couh yienghneix, Yahmoq bohlgw couh youq ranz dicuj gwn youq roengzdaeuj. Yahmoq seng miz lwgsai lwgmbwk song boub, song lwg de gig coeng–mingz. Gaijfang le, vunzmbanj ngoenzngoenz baedaeuq daeggvan Yahmoq, daeggvan de souh mbouj ndaej vunz ndaq vunz moeb, cag gyaet hoz dai lo.

Goenghgvangh mbanj gou miz sam boub lwg, boubxai song dah mbwk, mehyah de baenzbingh dai bae lo. Boub he naemj aeu geu vaq, boub he ngah aeu geu buh, couh yienghneix Yahmoq daiq song boub lwg de haq hawj Goenghgvangh, doeklaeng de caeuq Goenghgvangh youh seng miz song sai song mbwk 4 lwg, ranz neix couh miz 9 lwg, caemh 11 boub vunz doxgwn.

Ranz Goenghgvangh caeuq ranz gou doxnem, song ranz doxdoq faq ciengz ndeu, faq ciengz cungqgyang hai miz aen congh hung lumj aen bak duix he nei. Aen cangz daxmeh gou couh an youq bien bakcongh haenx, ranz Goenghgvangh gangj maz vah, ranz gou cungj dingq ndaej nyi, ranz de caeuq ranz gou yaek doxcuq maz doxgaiq, couh daj aen congh neix soengq vah gvaqdaeuj, danghnaeuz gij doxgaiq iq, couh daj aen congh neix

ndenq bae ndenq dauq.

Yahmoq haq daengz mbanj gou bide, gou ngamq doekseng, boh gou youq baihrog dang di daeuz he, ciengzseiz okbae haihoih, gou okseng seiz de hix mbouj youq ranz, gou dwg haetromh doekfag. Dingqny i miz sing lwgnding daej, Yahmoq couh daj aen congh haenx ndenq vanj souh haeux–yangz ndat he gvaqdaeuj, doiq daxmeh gou naeuz: “Seizneix hoj lai, mbouj miz bya miz noh gwn, ndaej gwn vanj souh ndat he couhdwg donq cei q ndei lo, mwngz vaiq swnh ndat gwn, boujbouj ndangdaej.”

Daxmeh gou doiq Yahmoq naeuz: “Ranz mwngz vunz lai, souh mbouj gaeuq gwn, mbouj yungh hawj gou lo.”

Yahmoq naeuz: “Cib boub gya–hoh, mbouj yawz boub roq ranz, raeuz ranz ndeu gaej gangj vah song ranz. Mwngz vaiqdi gwn, seng lwg deng iek, ngoenzlaeng lau miz bingh.”

Seizde dwg seiz hoj, vunzmbanj guhhong aeu goengfaen cij ndaej gwn haeux, ranz Yahmoq vunz lai, haeux gwn miz donq gwnz ra donq laj, gyoengq lwg de ngoenzngoenz daej dungx iek. Moix ngoenz guhhong sat le, Goenghgvangh caeuq Yahmoq cungj dwg swnh mbwn caengz laep hwnj bya bae ra byaekndoeng maranz cawj hawj gyoengqlwg gwn guh donq.

Mbouj gag dwg ranz Yahmoq mbouj miz haeux roengz rek, ndaw mbanj hix dwg bouboux iek dungx bae guhhong. Miz bi he bet nyied, ndaw reih lwgmaenz baenz aen lo, aiq dwg naemj daengz vunzmbanj cungj iek dungx bae guhhong, gyoengqdaeuz mbanj gietdingh daengz banringz couh faen boub vunz song aen lwgmaenz ndip hawj doenghboub bae guhhong guh haeuxringz. Yahmoq ngeix daengz gyoengqlwg, de gwn aen maenz daih’it le, mbouj naemj caiq gwn lo, aen lwgmaenz gyang fwngz lumh bae lumh ma cungj mbouj gamj coq haeuj bak bae, caj daengz gyoengqvunz cungj bae guhhong le, de laeglemx dawz lwgmaenz coq daengz ndaw dangzvaq bae, dajsuenq banhaemh dawz maranz faen hawj gyoengqlwg gwn.

Banhaemh sou hong lo, lauheiq

miz vunz caeg lwgmaenz bae ranz, gyoengqdaeuz mbanj aeu baez boub baez boub fan buh fan vaq ra, ra daengz Yahmoq seiz, goengdaeuz mbanj daj ndaw dangzvaq Yahmoq mo ndaej aen lwgmaenz he okdaeuj, goengdaeuz mbanj daihsing maenj naeuz: “Sou yawj ha, Yahmoq caeg lwgmaenz lo, ngoenzneix caeg fagcim, ngoenzcog caeg aen gim, boubvunz miz aen ukgyaeuj neix dou mbouj ndaej cuengq gvaq.”

Haemhde, Yahmoq ma daengz ranz lij caengz ndaej gwn caeuz, vunzmbanj couh dawz de daengz bakmbanj laj goreiz baedaeuq.

Seizde baedaeuq vunz mbouj dwg gangjgangj vah ndaqndaq geij coenz couh sat, caen dwg doengh din doengh fwngz. Mwngz gangj vah hix deng moeb, mbouj gangj hix deng moeb. Baedaeuq Yahmoq seiz, miz boub vix najbyak de, miz boub fak aen naj de, miz boub yungh gaemxgienz cuk de, miz boub yungh din dik de. Yahmoq bibi buengqbuengq ndwn mbouj onj, saemxsax saxsax youq mbouj baenz, caih vunz moeb, caih vunz dik, de mbouj ok saek sing.

Bide Goengliuj lij coz, vunz baedaeuq Yahmoq seiz de hix daeuj daengz henz, de raen Yahmoq deng baedaeuq ndaej gig hojlien, couh daihsing naeuz: “Gaej guh lai lo, yah neix dwg Canghlongh, de rox fap rox fouz, hangz de daiq lai daiq haenq lau dou deng nanh bw.”

Vunzmbanj mbouj lau cungq mbouj lau mid, couh lau boub Cangh–longh, dingq daengz gij vah Goengliuj, bouboux mbouj gamj gangj sang lo, goengdaeuz mbanj hix yaengx fwngz hwnjdaeuj coh vunz lai vadvad, ei qsei dwg hawj vunz dauqbae.

Riuznaeuz boub Canghlongh rox fap rox fouz, moix ngoenz haetromh hwnqdaeuj, byawz bungz raen daengz de, couh deng nanh lo. Lwngnyez bungz de, haeux mbouj gwn, buh mbouj daenj, youh daej youh nauh; boubxauz bungz de, ndang naet ndang naiq, youq mbouj onj ninz mbouj ndaek. Aeu bae gouz boub Canghlongh daeuj geij cij ndaej, mboujnex boub deng fap deng fouz couh bingh ciengx gwnz ndang, yied ngoenz yied roz, doek–laeng dai bae.

Hix mbouj rox dwg caen dwg gyaj, daj baezde hwnj, gyoengq bohmeuh couh doiq gyoengq lwngnyez naeuz: “Bungz raen Yahmoq aeu liz gyae di, de dwg Canghlongh.” Gyoengq boubcoz couh daengq boub–geq naeuz: “Yahmoq dwg Canghlongh, gaej bae gaenh de.”

Vunzmbanj bouboux raen daengz Yahmoq couh lumj lau dwk binghmazfung nei vaiqvaiq ndoj deuz, de byaij loh mbouj miz boub buenx, guhhong mbouj miz boub bang. Seizde guhdaih bae guhhong, Yahmoq cungj dwg boub dog gag youq giz ndeu guh.

(caengz sat)